

## JOXE MARI AUZMENDI HEZKUNTZA BEKAREN

### 2. DEIALDIA

#### ***Sarrera***

Deialdi honen helburua Joxe Mari Auzmendiren hezkuntza balioei jarraipena ematea eta hobekuntza pedagogikoa ardatz izango duen ikastetxeen eraldaketan eragiteko oinarriak ipintzea izango da.

Joxe Mari Auzmendik euskararen eta euskal kulturaren, hobekuntza pedagogikoaren, herri hezitzailearen eta inklusioaren inguruan ardaztu zuen bere ibilbidea: "Hezkuntzak ekarriko du gizarte hobe bat, gizarte justuago bat, orekatuago bat, parekideago eta euskaldunago bat. Baina hezkuntzak eginkizun handi hori beteko badu, bikaina, kalitatekoa izan behar du".

Ikerlariei, pedagogoei, hezitzaile taldeei edota unibertsitateei zuzenduriko beka hau Joxe Mari Auzmendik sortu eta gidatu zuen Hik Hasi egitasmo pedagogikoak sustatzen du eta Hernaniko Udalak diruz laguntzen.

#### **1. XEDEA**

Euskal Herriko ikastetxeek, gaur egungo erronka sozial, etiko, teknologiko, pedagogiko eta abarrei erantzuteko, eraldaketa prozesuak egitea beharrezkoa dute. Eraldaketak marko teoriko eta bide-orri metodologikoa behar ditu. Beka honen helburua, ikastetxeen beharrei erantzungo dien ikerketa eta azterketa egin ostean, eraldaketa prozesuan lagunduko duten oinarri teorikoak eta metodologikoak proposatzea izango da. Horrela, etengabeko hobekuntzarako bidean, beka honen emaitzak Euskal Herriko ikastetxe guztientzat lagungarria izan daitekeen bide-orri bat proposatuko du, bide-orri orientagarria, iradokitzailea eta praktikoa, hain zuzen ere, horren gainean, ikastetxe bakoitzak bere prozesua egin dezan ondoren.

Lan honek, Joxe Mari Auzmendik bere ibilbidean landu zituen hezkuntza balioak ere jaso beharko ditu:

➤ Hobekuntza pedagogikoa

Gizartea aldatzen doan neurrian aldatzen da hezkuntza ere. Hezkuntza-berrikuntza funtsezkoa da gizarte batentzat, iraganeko gaizki-eginak gainditu eta etorkizun hobe bat eraikitzeko bidean.

➤ Euskara eta euskal kulturaren biziberritzea

Euskararen erabilera bultzatzeko eta indartzeko eta euskal kulturaren transmisioa sustatzeko ekimenak izatea. Haur eta gazteen eleaniztasuna sustatzeko bidea euskararen eskutik egitea da helburua, euskara eta euskal kultura bizitzarako tresna eraginkor bihurtuz.

➤ Herri hezitzailea

Jolasa eta sormena ikasteko eta garatzeko tresnatzat dituen haurren kultura aitorturik, haurrei benetako parte hartzea eta erabakitze ahalmena ematea. Haurrek beraiek eraikitako aisi hezitzailearen eta euskaldunaren bitartez, aniztasunean berdinak eta parekideak izanez, eta ingurumen naturala eta kulturala zainduz, komunitate-sarea eta auzolana indartzea da herri hezitzailearen helburua, pertsonen arteko harreman osasuntsuak, justuak eta asegarriak jostea.

➤ Inklusioa

Guztionez beharko lukeen herri inklusioa eraikitzeko, oso garrantzitsua da izaera bereziko gaiak lantzen dituzten haurren eta familien ongizatea eta balioa aitortzea eta ikusaraztea. Elkarte, haur eta familia horiek transmititzen dituzten balioak jaso behar ditu hezkuntza-komunitateak, gizarte moduan aberasteko eta hezteko.

## **2. IRAUPENA ETA ZENBATEKOA**

Bekaren iraupena bi ikasturtekoa izango da.  
Bekaren zenbatekoa 12.000 eurokoa izango da.

## **3. HIZKUNTZA**

Proiektua euskaraz landuko, idatziko eta aurkeztuko da.

## **4. ONURADUNAK**

Euskal Herrian Hezkuntza-hobekuntzan dabilzan ikerlari, ikerketa-talde, pedagogo, hezitzaile taldeak edota unibertsitateak.

## **5. ESKAERA EGITEKO EPEA ETA LEKUA**

Proposamenak aurkezteko epea 2023eko abenduaren 1ean amaituko da eta epaimahaiak, aurkeztutako lanak aztertu ostean, urtarrilaren 8an jakinaraziko du saritutako proiektua zein den.

Dokumentazio guztia gutunazal batean sartuta honako helbide honetara bidali beharko da: Hik Hasi bulegoa, Errekalde hiribidea 59, Aguila eraikina 1-1 solairua, 20018 Donostia, honako izenburua jarrita: *Joxe Mari Auzmendi hezkuntza bekaren bigarren deialdia*.

Aurkeztu beharreko dokumentazio guztia digitalki ere aurkeztu daiteke, fisikoki aurkeztu beharrean. Kasu horretan, dokumentu guztiak PDF bihurtu, karpeta bakar batean bildu, eta posta elektronikoz bidali beharko du, honako helbidera: [jmauzmendibeka@hikhasi.eus](mailto:jmauzmendibeka@hikhasi.eus).

Aurkeztutako dokumentazioa osatu gabe balego edo oinarri hauetan eskatutako baldintzak beteko ez balira, interesdunek hiru eguneko epea izango dute dokumentazioa zuzentzeko edo osatzeko. Hala egin ezean, eskatzaileak atzera egin duela ulertuko da.

## **6. ESKAERA EGITEKO DOKUMENTAZIOA**

Parte hartu ahal izateko honako dokumentazioa aurkeztu beharko da:

- Eskaera-orria (I. eranskina) behar bezala beteta.
- Ikerketaren nondik-norakoa: izenburua, azalpena, helburuak, lan-lerroak, metodologia, aurrekontua eta lan-plana.
- Parte-hartzaileen ibilbidea.

Hori guztia gehienez 10 orrialdetan jaso behar da (DIN A-4 formatua, 12 tamainako hizkia eta ohiko tartea).

## **7. EPAIMAHAIA ETA IRIZPIDEAK**

Lau izango dira aurkeztutako lanak aztertuko dituen epaimahaiko kideak: Hernaniko udalaren ordezkari bat eta Hik Hasi egitasmo pedagogikoko hiru hezkuntza-aditu.

Epaimahaiak proiektuak ebaluatzeko eta hautatzeko, irizpide hauek hartuko ditu kontuan:

- Beka honen helburuekin bat egitea. Xedea Euskal Herriko ikastetxeei hobekuntza pedagogikoan sakontzeko oinarri teorikoak eta metodologikoak proposatzea izango da. Bekaren bidez egingo den ikerketaren eta proposatuko den bide-orriaren ardatza hobekuntza pedagogikoa izango da, baina zehar-lerro moduan hiru gai hauek ere barne-bildu beharko dituzte ikerketak eta emaitzek: euskara eta euskal kulturaren biziberritzea, herri hezitzailea edota inklusioa.
- Bekaren emaitza ikastetxeentzat erabilgarri izango den tresna bat proposatzea izango da. Tresna horrek, ikastetxeei eraldaketarako bide-orri bat proposatzea izango du helburu eta bide-orri hori oinarri zientifiko, pedagogiko eta praktikoz osatu beharko da. Tresna ezein euskarritan argitaratzeko modukoa izan beharko da, izan paperezko argitalpena edo web bidezkoa.

## **8. BEKAREN ORDAINKETA**

Ordainketa modu honetan egingo da:

- Onuradunak jasoko duen zenbatekoaren %40 proiektua hautatzen den une berean emango da.
- Gainerako % 60a bi zatitan ordainduko da onuradunak eta epaimahaiak adostutako epeetan, beti ere beka irauten duen bi ikasturteko epe-mugaren barruan. Ordainketa hauek egin ahal izateko, onuradunak zehaztu egin behar du zer lan egin duen eta zein aurreikuspen eta lan-plan duen hurrengo hilabeteetarako.

## **9. ONURADUNEN BETEBEHARRAK**

Honakoak dira bekaren onuradunak bete beharrekoak:

- Hamar eguneko epean beka onartzen duela jakinaraztea. Aurreikusitako lan-programa ezingo dela bete edo kalitatea ez dela bermatuko jabetuz gero, beka itzultzeko konpromisoa hartzea.
- Bekaren helburuei lotutako lan-programa garatzeko dagozkion jarraipen-saioak egitea epaimahaiko kideekin edota Hik Hasiko kideekin.
- Proiektuan aurreikusitako eta jasotako helburuak, metodologia eta lanak garatzeko konpromisoa hartzea.
- Proiektua adierazitako epean entregatzea.